

四庫全書

集部

欽定四庫全書

江湖長翁集卷三十八

宋 陳造 撰

啓

房州交代啓

老涉官塗可堪跋履情依德宇倍切傾馳行酬披霧之
私庸締合符之契敢攄衷蘊劣具柔緘某官儒者司南
士鄉宗主疏榮桂籍慈恩無幾之在前奏課花封單父
繼聞於多暇策足合霄霏之上題輿姑風月之分今焉

告瓜戍之期繼此抗楓宸之對需扶亨運盡展壯猷某
書社陳人淮鄉冷族服勞州縣笑跛鼈之不前繫夢樵
漁叢冥鴻之何慕尚帝飢號寒之迫輕重山複水之行
幸奇蹇之暮塗嗣仁賢之英軌漢河南之畫諾稔聽風
謠楚令尹之告新更資鑄警

郡太守啓

諭官期於天未久切遡風仰德望於斗南行將披霧敢
藉鱗鴻之便庸修竿牘之恭某官龜鏡羣工範模一世

懿文卓行儼乃祖之高風露冕褰帷躬斯人之司命中
外侯公侯之必復廟堂知旅力之未愆佇膺尺一之褒
優義魁三之慶某儒冠蹭蹬官業迂疎虛名不救於啼
號局步敢期於軒趨彊顏佐郡忘六十翁之衰取道浮
家輕三千里之遠幸吏師之可法仍德宇之焉依縮手
觀傍即上承宣之課最因人成事與霑飽暖之君恩

答梁教授啓

瓜戍有期付修塗於去鷁芝眉入夢挹嘉惠於來鴻春

風和氣之滿絨明月夜光之溢目老方殿縉紳之後何
補盛時貧猶服道路之勞姑從吏隱省鳩鵲之技念呈
拙以何為蓬鴛鴦之羣指掩瑕而有待喜朋簪之將盍
倏雲翰之遠投瑤玖之報李桃曷云其稱玉刀之資礪
錯其自於今

答葉都監啓

心期有在何計秦吳科目是拘遂分肝膽頃公言交口
之見諗果王事同寮之得才人謂斯何吾知免矣某官

東南一雋文武雙優萬卷撐腸謝臞儒於山澤千篇橫
槩抗奇志於伊吾屢魁右學之諸生旋射集英之大策
仕雖地遠勿云禦寇之卑才則時須即有升華之寵眷
惟老嫺得與周旋日近石交已若弦韋之在側袖銜文
卷不樂珠璧之暗投但知珍玩之為榮未有絲毫之論
報

答竹山楊知縣啓

驅傍險之車自憐惴惴日歷班荆之地尤切思賢拜嘉綯

縟之文一洗勞勤之歎誦詠數過妙斲庸示於拙工始
終一謙深藏今信於良賈眷惟邑政顧屈時英小為星
歲之留需溢鶚章之數佇牛刀之最課看鳬舄之冲霄
自莫逆與友之初已傾意氣豈同官為寮之義猶靳鐫
磨沐流問之不遺愧修辭之已後

答高司理啓

戴星無斃舊叨府主之薦函披霧有期復拜郎君之教
墨凜然風義逮此衰殘載披繡段之華不覺屐齒之折

某官才猷敏劭問學淵通滕上風流推義方之有自眼中才雋信餘子之平吞姑徐隔坐之除來試問囚之事念龍門之舊客未肯棄捐勤鴈足之尺書首加存省是蓋窮塗而得石友不止空谷之聞足音美疾寧惡石之如息黥有待瓊瑤謝木桃之施匪報為慙

答尹解元啓

竒英入彀滿副時須大貝充庭有光吏計詫主司之得雋知支郡之有人某人胷次無塵筆端有口師魯之擅

卷三十八
簡古綽見祖風吉甫之詠清微密傳經旨曩錦標之優
奪茲火浣之重燒掇仙人綠雲之衣平凌月窟慰老子
青眼之舊果破天荒功名啓途里閑計日江梅粟玉崩
騰開鵬翼之程春酒湛觴準擬醉龍頭之客

答路上舍啓

不可有二之文喧傳梓里方今第一之選誤聽鵲音財
別榜之見收駭公言之尚鬱長牋拜賜老眼增明某人
優讀父書蔚為國器當千較藝坐收拉朽之功旅百克

庭合首觀光之客夫何幹鼎而寶瓠真成射目而中眉
燈火可親春秋尚富中虎闈之雋姑今秀造之知歸題
鴈塔之名蓋亦功名之未晚

答王上舍啓

試闈蹉跌雖不偕鄉老之書文力清竒終然動主司之
聽小緩集英之對姑為璧水之遊拜粲然藻翰之貽識
賢者義命之戒某人經藏腹笥文挾春華姓字壓六州
之英信難伯仲是非決一夫之目顧處下中效已試於

仙方昏似成於金注抱負在我屈信有時雖云小得而
大遺無乃愈鈍而後利太學待何蕃為重平心作三歲
之留淄川上孫洪之名拭目看諸儒之冠

答胡學長啓

十年蓄學靜以須時萬里論程此焉進步豫章胡宜於
小用荆玉深愧於暗投眷是勤劬若為報答知季子之
裘已弊寧不興憐儻監河之粟有餘豈應固惜官曹冷
甚郡計枵然勉為君謀試小割鷓鴣之肉能明我意聊

助加驥跡之鞭

答路主簿啓

不平則鳴正須審克先入為主幾亂偽真載欣君子之
得輿聊貸小人之滅趾兩造得情亦其常事一緘叙謝
何乃過謙聽訟貴夫無心察人考其素行居然乾沒幾
成瞰屋於玉川此復致疑豈有酖人之叔子略加詰問
畢見欺誣彼既厚負荆之顏此姑薄謫金之罰事非獲
已得屨果從者之廖君其自今徒行免大夫之後

答竹山鄭宰啓

邑政非人寢成弛廢郵音到眼大慰傾瞻玩辭永之不
凡豈朽枯之可稱某官擅楚材之瑰偉追漢吏之循良
種河陽之花中袖陽春之手製尹何之錦再揮斲鼻之
斤聲華翕載於僉評餘力佇新於積弊揣越俎之無取
喜盍簪之有期隻字分華袞之褒何容得此九里借靈
河之潤其始於今

答樂解元啓

鄭鄉小駐仰都騎之雍容襴刺見投略冗官之衰朽忽
衝牙之振響恍郅屋之生光某人雷劍藏鋒楚珩論價
子長少有四方之志越相肯為一鄉而留定知達者之
高懷偶動歸歟之逸興舊都舊國話親友之故情某水
某邱訪釣遊之勝處夫何蒙昧顧肯臨存衮字拜嘉慙
平生之碌碌錦囊新得尚餘惠之頻頻

答竹山鄭宰啓

牛刀再試一皆飭蠱之規繡段墮前備見鳴謙之意情

偕辭而兼厚仕與學以兩優悉諸見聞良用歎服釐拯
既弊每易見功別攘宿姦尤當謹始惟令君所以施設
在鄙見廼無差殊藥能起死決非下醫奕之取勝或因
敗局如治家者求義方鞭扑之餘稽化工焉暢春事雪
霜之後束濕似非嫩矣揚湯如益熱何側聆條教之肇
新已見吏民之改觀不已者神所畏宜終始之屬思過
情乃古所辭顧推褒之非稱方時多病答教後期謝不
敏以雖勤應且憎之寧免

賀淮漕移浙漕啓 已下並代人

澄清之最久達中宸褒寵有加就移內部遠俗喜賜環
之亟邇寮快覩鳳之先載瞻使者之星已近長安之日
竊以舉刺之任分委諸道畿甸之地密邇九重凡激濁
揚清固不輕於畀付然自中及外尤莫重於本根眷茲
右輔之浩穰允繫羣方之觀聽八州餽餉必也不擾而
錢流百吏觀懲要使聞風而心革克堪至重之責孰如
已試之才迹夫所為優有成效茲由才德之選實曰公

卿之儲恭惟某官德宇恢洪才華秀粹曾武庫而用則
不器手干將而授之成風擁麾都梁旌孺咸依於召父
攬轡淮右衣冠共戴於蘇天載在僉評不容久外江淮
它日被萬福之威名朝廷諸公知弱翁之治行以公自
近由帝深知不寧推按澄之功繼將有禁近之拜某辱
知有素荷庇實深佩印虎城親受故侯之規畫搏風鵬
路尚依先達之輝光展賀末由馳誠徒切

賀浙西漕除總領啓

十行芝檢來自層霄一道使權總之碩德省蘭寓直營
柳回春方遠邇之悚聞翕驩謠而載路乘輅問俗孰遵
前日之教條足國裕民行繼昔賢之事業某官稟絕人
之識為名世之儒挺薦紳表而雅推獨行之賢讀古賢
書而不為無用之學棟梁杞梓允謂良材袞繡文章直
其餘事自橫蜚於仕路即妙簡於宸衷百吏革心咸仰
范滂之攬轡列屯宿飽未多葛亮之雜耕況此常暘之
餘良苦轉饟之梗河流如帶千艘銜尾以莫前粒食比

珠萬旅張頤而仰待事有至難顧今乃爾賢必已試然
後用之不有一代非常之才曷振此時無足之策輦駕
以輸河內少留子翼以給軍根本之固關中側佇鄴侯
之相國要令元勲之冠列辟豈止再見而位上卿某猥
以郡符撫茲淮俗久依風於德宇今賴寵於使臺聞嘉
命之真傳撫微躬而知幸成於自同敗於自異需使指
以趨承清之不濁澄之不清尚仁人之覆護

賀宰執加官啓

孚號明庭疇庸近弼惟時盛禮亘今昔之未聞推上至
仁遍邇遐而均被况鴻名申述於上聖而鉅筆允資於
大儒驪傳兩宮信示萬世雖文階一級未足為大臣之
重輕而睿旨四頒莫不竦天下之觀聽云云 歷攷帝王
而下鋪觀典冊之傳奉未央之酒者壽祺之幾聞上應
乾之名者紀述之猶陋固已增光信史夸示當時孰若
堯舜共揖於一家稷臯叅聯於四輔五福一曰壽衍遐
算於岡陵大德必得名揭洪休於日月繫鋪張揚厲之

力底輝光篤實之新恭惟某官名世真儒爽邦碩輔躬
持正學傳孔子孟氏之道原鈞播生民如伊尹周公之
聖偶謦欬皆格心之業雍容收論道之功屬皇家洪祐
之申休乃太上修齡之行慶虔修寶冊寅奉慈皇揚德
業之登闕聖而益聖紀乾坤之高厚名非常名發揮六
藝之情文陟降一人之左右賴良佐之鴻筆成熙朝之
上儀帝曰汝嘉爵豈予靳繇廟堂贊襄輔成於聖孝則
股肱承弼可後於褒章惟皇極敷錫厥民宜王明並受

其福上德以有德方迎未艾之天休大書不一書倚俟
浮膺於帝渥某奉親尸祿乘障罔功夢想台光辱在照
臨之下眼明郵報不知鼓舞之由自今疊舉於祿容繼
此嗣馳於賀幅

賀周右相啓

誕告公朝廷登碩輔雖事樞久秉終符巖石之瞻而帝
載用熙始喜台躔之正晉陟文階之峻陪敦井賦之腴
併茲便蕃異數之隆庸示體貌大臣之意偉聖賢之聚

會聳夷夏之聽聞恭惟驩慶伏惟某官真儒範時全德
踵古心潛聖學得孟氏之正傳道覺天民負阿衡之大
任儀仕塗之寢久繫朝望之益深謂周家守成必也資
彼上宰而司馬不相何以活我生人顧兩地優游厯載
於茲而九重注委惟公是眷能用三傑子房乃帝者之
師襄我二人尚父實聖人之偶一旦正中台之位兩宮
倚泰山之安蓋大賢生世意天甚難然明時論相在帝
不苟既精神同魚水之契將勲業侈竹帛之傳佇殫經

濟之心用究規恢之略某之衰晚意已彫零辱知最深
係望深切賴德宇之庇居惟引領以自怡聽麻音之傳
想見在庭之相賀屬縻郡寄阻厠客間了知白首之餘
更有洪鈞之託

賀施知院啓

光膺帝制晉陟樞廷上春日隆國威坐振惟真儒之進
用繫寰宇之重輕雖與政彌年未究經邦之蘊惟本兵
要地正須幹國之賢端宥密於廟堂庸折衝於樽俎茲

聖賢之聚會聳夷夏之聽聞伏惟驩慶恭以某官德稟
兩儀學高千載心潛孔聖得顏孟之正傳文挾漢廷小
淵雲之麗藻雖徧儀於華近曾未究於經綸朝廷知弱
翁之行能久勤注想夷狄問晉公之名姓盍副倚毗旋
奉隆恩入叅大政况上謀決帷幄之勝而全國無疆場
之爭儻非登進於儒宗何以密裨於廟筭天開千載一
時之華旦日騰兩宮萬歲之驩聲可無除戎器謹萃聚
之時會當誦車攻繼周雅之詠惟公任此視古過之亟

正位於師臣究惠疇之相業某之衰晚志已彫零辱知
最深屬望尤切竊厦屋之庇仰厚德以依歸聽綸言之
傳激懦衷而踊躍屬縻郡寄阻造客間託造化於鈞衡
沐恩有地數安閒之日月撫已留年

賀蕭叅政啓

誕揚帝綍晉與政機酌公論於朝僉舉真儒而柄用儀
圖袞職之補賢不假於外求調燮太和之元治益新於
輿望宜乎不動聲色端拱廊廟之上可以不建事功婉

儷祖宗之時仰聖賢之相逢格夷夏而胥應伏惟驩慶
恭以某官德稟天地學窮古今道統有傳密受孟韓之
正文宗不墜挽回舒向之醇出則逢辰進將致主雖徧
儀於華顯然尚鬱於僉俞方帝載疇咨冀有裨於盛治
暨王佐大用今始快於公言况鼎湖之莫攀而宸極之
在疚不言罔由稟令茲適亮陰之初告后爾有嘉猷正
賴彌縫之力既已登老成而立治表是宜慰人心而固
邦基行瞻下相袞之褒當亟正師垣之拜盡推所學高

蹈前修某適用無堪辱知最厚竊厦屋之巨庇苟託衰
遲聽麻音之真傳尤多踴躍屬縻郡寄阻遙客間即今
台宿之光第勤拭目繼此翹材之館猶許登門

賀黃察院啓

光奉宸恩晉居言職喜正人之道長翕善類以氣伸雖
砥道坦平尚或徂竒衰之習惟官箴肅示顧敢輕糾正
之司直諒一登邇遐四賀恭惟某官識窮繫表理探古
初經竒潛心不役於無用之學仕塗策足亟疇其有為

之心蚤副公言漸儀華貫在木契雌雄之掌寧復久淹
顧烏府糾察之權旋當小試蓋將端倪天下之治豈止
繩根官曹之違况公朝圖治之勤而聖主求言之切忠
謀讜論必切中於事機致君澤民益大恢於賢業於焉
落衛將之膽巍乎立朝班之心陳儒術帝王之隆躋治
世祖宗之盛致身槐棘紀績彛常蔚為吾道之光大慰
海隅之望某牧民無補慕德最深方郵報之真傳拊心
期而竊抃河潤九里仰大庇以焉依歲閱三遷嗣賀音

而未沫

賀趙漕應辦山陵轉寶文閣啓

光奉明綸峻陞延閣扈因山之役不日奏功揚渙汗之
除自天紀績朝僉允睦時望益隆伏惟驩慶恭惟某官
學粹一源身兼數器楚珩趙璧世莫指瑕干將鏌鉞物
皆迎刃自橫翔於仕路已妙簡於聖心方使華奏最課
之優而慈極纏上賓之痛惟時竈事倚辦宗英約束陽
侯安流以濟指麾風伯纖塵不驚真真遊弓劍之藏寬

翼室羹牆之念眷惟勞烈孰與擬倫鬱層閣之祕嚴萃
兩朝之製作茲焉庀職副是疇庸翕輿議以稱公見明
時之馭貴某幸同委質況比分臺聆睿渥之鼎來激愚
衷而自慰清資益峻豈惟奎畫寶儲之司賀幅繼馳亟
有甘泉法從之拜

賀浙東提刑啓

細書溫詔來自中天近甸祥刑畀之碩德藹平日惠慈
之譽慰東人跂望之心辱在同寮深誥素願恭惟某官

自天稟粹經世有為鳳躍蛟翔冠時賢而屬望龍韜豹
略重國勢以折衝大副朝僉益隆睿眷先周廬之諸衛
嚴扈九重接漢使之六條平反庶獄惟涖民之甚弊幸
歲事之粗豐須公之臨延頸以冀瞻旌麾而動色近繡
斧以生春即看狴犴之空亟正節旄之拜某久違望履
幸此分臺原隰驅馳愧拙勤之何補珠璧輝潤丐警誨
之不遺苟追曠瘼實繫左右

答淮西方漕啓

效官昭代無益公家持節近畿獲依蔭宇揆拙勤之不
補方應接以為罷未脩記府之恭首拜誨函之賜見存
已厚不敏是慙恭惟某官望重一時身兼數器性姿超
卓稟粹自天學術淵深探原於古逮橫翔於仕路亟簡
注於上心隨用具宜有施皆可揚橋門之教接收造士
之功佐貨府之頒曾靡負丞之歎即因最課旋畀左符
未建郡牙遽前君席霜蜚齒頰陳兵農富彊之規米聚
山川指江淮表裏之勢益承帝渥庸遣使華棊布百城

皆樂生之赤子雲屯萬旅有棲畝之餘糧凜如孔明屯
渭濱之師即見公孫上金城之略入參廟箕坐振國威
盡令車笠之遊從同出睥睨之庇覆某自憐老境外典
祥刑雖原隰不憚於載驅而鰥寡尚虞於無告正資鑄
切冀免曠瘼茲辱朶雲之書但形褒拂遽令覆蔕之室
蔚有光輝

賀潘漕啓

恩言如綍申需龍光漕計須材重分玉節振本根兼足

之策得中外已試之賢慰適人觀聽之新孰前日教條
之舊伏惟驩慶恭惟某官氣涵剛大學有本原金鐘大
鏞為寶固重芝草靈鳳瑞時皆知蒲鞭騰愷悌之謠綠
服奉平反之笑益隆朝望深結主知眷近甸之輸將方
資時彥最異時之讞議允謂老成小遲法從之陞存錫
使華之賁錢流地上豈惟收富國之功玉立朝端行且
既格心之業盡摠賢蘊大穆師僉某久矣向風茲焉賴
庇與有分臺之喜良慰願言側聆持橐之除嗣馳賀幅

賀耿安撫啓

帝庭一札之書渙宇睿渥天邑四方之極晉昇時英惟
時皆稔德之民相語已望風而化蓋令行率由於身正
而源清自底於流長聲稱載揚中外交賀恭惟某官學
傳千載用集衆長儲重望於縉紳結深知於旒宸剖符
鐵甕今餘愷悌之思持節繡畿洵究激揚之志上念帝
都之根本勢為天下之樞機適丁空匱之時庸付通明
之彥雖四方情偽之紛集剗決為難然它日揚歷之在

斯見聞已熟首清俗習枚示教條剔索鋤姦行奏趙張
之最師言底績亟參臯稷之聯進輔熙朝並恢遠業某
久依德宇方仰政規衰晚何為莫追官箴之闕拙勤或
補願分鄰燭之輝

賀李察院啓

有命自天誕推渙渥得言之地登進正人由睿眷之東
求亦清朝之公議邇遐萬口驩喜一辭大忠將自是以
復君善類固於焉而吐氣恭惟某官妙窮道奧識造象

先學蓋得於家傳材畢周於世用六經斟酌揖古人而
與俱多士楷模繫君子之自任一從仕進藹著聲稱奏
馴雉之祥屏書姓字聯乘驄之屬氣壓權豪溫乎白璧
之無瑕凜若朱繩之不撓方聖主布惟新之政念臺寮
須特立之賢矧時望之在公允師僉之自昔盡行所學
其始於今大正官箴翕朝綱之肅穆旁開言路屹治具
以恢張佇參燮理之權庸輔盈成之治某依仁有素荷
庇益深烏府生風已絕豺狼當路之歎魚封頌德少伸

燕雀賀厦之誠方事使軺之馳阻趨賓幕之下

賀黃正言啓

渙奉詔音晉司言責楓宸妙柬素高難進之風袞職方
虛庸付弼違之託非正臣無以立治表而老成所以重
典刑遐邇聳聞縉紳交賀伏惟驩慶恭惟某官昂精孕
秀崧嶽降靈正大之學踵躡前修淳深之文表示後進
久儲時望旋上仕塗中外踐揚雖宰字勾稽之細胷襟
抱負皆經綸鯁挺之奇果妙契於宸衷俾橫翔於諫省

惟平時涵養發固不苟然當世利病講之已詳雖四方咸稱已治之時在庶務豈無當言之事明目張膽吐論有可回之天考古驗今致主立無過之地非徒君可而臣曰可所謂言行則道亦行亟躋禁嚴用究康濟某焉依有素欽佇匪今正人得路之云初盛世迓衡之可卜展盡二百奏行即繼鄭公之愛君不言凡七年可復為陽城而著論限以驅馳原隰阻遠門闌喜雖倍於他人進莫偕於賀客

答湖南憲啓

聖世謹刑上心重遠輟中朝之賢傑敷南紀之教條列
郡謳謠想已在春風和氣一時畏愛顧何用柱後惠文
某官材重把楠氣涵金玉汪洋有本之學隨用而宜懇
惻利人之心益推所愛久矣僕晉卿之日茲焉占漢使
之星乘輅小駐於湖湘補衮亟還於槐棘某拙勤不補
瘵曠是虞引領平反之風依依朕夢盥手褒拂之語一
過情

答常守啓

朝廷擇牧宸慮優賢寧容遠次之需果有近藩之拜方
賀誠之未展忽問幅之見貽把玩再三競慙千萬某官
稟清淑之氣為通練之賢翱翔仕塗詩書用之飾政術
翕赫課最姓字久矣結上知盍冠壓於朝班况低回於
家食惟毗陵之名郡居浙右之要衝千里向風薤水亟
孚於美化五日報政絲綸佇下於中天某誤叨聖恩尚
殿朝著鷗盟未替歎夢境之空勞魚素鼎來愧衮褒之

甚寵

答淮西漕啓

來啓謝制
諸褒子

命下九重身紆三組天子念循良之寄其任匪輕詞臣
居潤色之司每慙不稱夫何拜賜有此過情某官名高
斗南價重天下蔡澤之於富貴當自取之杜陵之論文
章猶小技耳望實久孚於朝右忠誠深結於主知茲出
綽於帝宸俾乘輅於淮甸惟形勢表裏之地非賢不居
而絲綸斧藻之言其才難彊聲宏蓋由乎實大思遲未

見於文工泚筆特書方申顏而自咎開緘敬讀幾袞字之過褒

答鎮江葉守啓

輟從近侍出領便藩堯文儲東壁之輝榮參禁直禹甸重北門之寄庸荷顧憂念賀幅之尚稽愧誨函之先辱恭惟某官爽邦碩德名世真才探正學之淵源躬斯文之經緯踐揚中外如庖丁之善刀獻替禁嚴仰山甫之補袞儲列辟之重望結兩宮之深知瞻尺五之天共須


秉鈞之拜疇百二之險自詭殿邦之行惟鐵甕之名城
實天朝之巨屏賴宗工之作鎮重國勢以折衝側佇揚
舲即承開府吳公本漢廷右載上民庸安石如蒼生何
行攄相業某才多違世仕不先人方攬轡而驅恐拙勤
之不補藉為寮之益庶瘳曠之或逃茲引領於州麾冀
分光於鄰燭有如不敏猶或見容

賀林殿院啓

榮膺宸紘與領臺綱著定聯華夙已期於我牙權豪屏

息茲相戒以避驄正人得時善類吐氣恭惟某官儒英
輩古德操範時掩文價於二京探道原於六籍學充而
富視趙孟之欽然氣養以剛過孟賁而遠矣自通朝籍
深簡皇心冠六察之司雖參持於邦憲圖一臺之正方
注委於時賢帝曰汝嘉誰處公右然施於事者繫所養
而裕厥德則優於言眷望實之已孚翕班聯而歸重風
采所厲孰非默就於表儀官曹之清政恐不煩於繩治
懿網醲化坐臻載歌東府西樞尚有虛席行試調元之

手盡酬及物之心某一節服勞萬間席庇傾瞻德宇夢
亦繫於臺烏阻遠賓墀賀徒深於厦燕



江湖長翁集卷三十八

欽定四庫全書

集部

江湖長翁集卷

三十九
四十

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣何銓

欽定四庫全書

江湖長翁集卷三十九

宋 陳造 撰

疏

祈雨雪寺疏

雨雪愆期民人告病咎由吏職憂甚頭然懇祈不憚於
再三感格庶幾於萬一冀諸佛無方之應錫以有年喜
六花盈尺之祥始自今日佐春工之發育起墮麥之焦
枯密賴等慈是蒙休應凡一穀不熟謂饑少息凶年禱

負之悲自三曰以往為霖更迎嗣歲金穰之慶欽惟悲
願洞鑒翹誠

祈雨雪觀疏

麥苗告病由雨雪之愆期吏職所憂仰昊穹之是禱屢
殫蠲潔有冀感通見睨漉浮喜崇朝而汎洒罔時恫怨
慰嘉穀之焦枯荷陰隲於神休凝至和於歲事既沾既
足生我百穀佇可期盈尺之祥是穰是茲必有豐年庶
無復荐饑之歎是伸謝悃願鑒丹誠

觀音殿謝晴疏

有生實難一氣運行之或戾無刹不現羣靈依怙於等
慈自冬而春不雪即雨嗟民愁之已甚顧人力以何施
殫我寸誠扣彼大士宏誓善應歛桴鼓之感通新陽發
生喜煙霾之解駁挽回和氣播作懽謠梵音觀世音不
替利它之願人樂與衆樂佇迎嗣歲之祥

祈雨觀音疏

久旱為憂斯民抱倒垂之病無刹不現大士有宏濟之

仁肇告丹誠即蒙休應油然雲沛然雨且蘇槁乾林而
生總而羣庶絕愁歎是伸昭報少答洪私更推三日為
霖之功迄終百穀用成之惠我相衆生相寧間自他梵
音海潮音普同依怙

又

旱氣赫然民情憂甚禮嚴祠崇念丹誠籲天而莫通教
在音聞惟大士應聲而必赴寅羞靜供哀扣能仁伏願
辭補陞內院而慰依怙心視光福報恩而無去來相大

雲澍法雨蘇百穀於暎焚膏澤多豐年寬九重之憂顧
解散祈雨道場疏

比緣久旱祇扣能仁赴初願之利它答微誠而應供漂
然汎灑雖粗慰於民情尋亦槁乾恐竟傷於歲事敢勤
法馭久駐城闈猶冀等慈不忘終惠油雲沛雨寬聖上
宵旰之憂應物現形賴世間慈悲之父

祈雨滿散疏

時雨愆期稼事告病哀民愁之已甚邈帝眷之未回虔

演仙科迄終醺席恭願一下霈然之澤載矜蠹爾之氓
三日為霖尚奏豐登之慶兩宮稱壽頃寬宵旰之憂嘉
與海隅永依道蔭

諸廟謝雨疏

雨不以時禾將枯槁吏方修禱神罔怨恫霈然甘澤再
此沾滋蠹爾生民一皆鼓舞乂時暘肅時雨猶賴節調
比如櫛崇如壙坐凝庶富少伸昭報仰答洪私

觀音殿祈雪疏

良農望歲即雨雪而驗年豐大士能仁以聲音而作佛
事凡其副感曾不遺聞蠢茲郡民跂彼瑞應冀圓通之
示現祛氛禳以潛銷蟠地際天同一雲而布潤耕田鑿
井慶盈尺以為祥密賴等慈俯矜衷悃

真武殿祈雪疏

雪事缺如揆時已迫天神貴者有感必通眇爾哀誠敢
茲控扣眷惟吳郡密近都城日邊盈尺之祥已書史冊
境內兆豐之望未愜民心仰冀洪私俯垂哀祐同雲灑

潤達誠意於九清嘉瑞應期告歲功於三白

佛寺祈雪疏

天未雨雪歲序將窮佛之利生人心所怙仰冀等慈之妙力挽回洪造之至和俾右湖左海之區屢豐慰望凝友風子雨之氣盈尺告祥欽惟兩足之尊亟副羣情之願

滿散祈雪觀音殿疏

雪事愆期郡民告病惟菩薩大慈悲父具佛子不思議

心致此懇祈密冀能仁之力漂然汎灑未收潤物之功
憫我投誠庶其終惠

真武殿疏

時將發春雪未應候守臣軫饑疫之慮夕惕疚懷真聖
幹造化之機心存濟物粗效迴翔之勢未收沾洽之功
冀達彼蒼克終此惠

真武殿祈雨疏

歷時不雨農以軫憂在天之神職司兼濟矧無幽而不

燭信有禱以必從伏願訶畢宿以騰芒吡龍公而起伏
自三日以往需甘澤以沾滋靡一穀不登底斯民之富
庶誠或交於水位祥冀兆於金穰

銅像觀音祈雨疏

適長嬴時民嗟久旱有慈悲父誓濟含生儼補陀海上
之睟容罄索訶世間之真禱伏願辭獅子座覆以慈雲
倒龍伯宮需為蜚雨體九重之宵旰息比屋之怨咨仰
冀遺聞永依慈怙

諸廟祈雨疏

歷時之旱闔境其咨念平時奉嘗之神是所依者於斯
民饑歉之感渠能忽然躬即靈祠瀝陳懇禱伏願體當
寧之意護國不忘圖嗣歲之功籲天有請鞭起羣龍之
伏需為三日之霖坐俾邇遐迄臻富足

祈雨觀音滿散疏

旱氣蘊隆人情跼蹐念彼大士應身剝塵仰惟能仁赴
世哀籲茲嚴羞於淨供庸申控於洪慈現聲音圓通諒

自他之不隔澍甘露法雨俾焦卷之立蘇佇俟有年庶
幾本誓

祈雨真武滿散疏

穀今就枯雨不時霈仰惟真聖幽必燭而願無不通矧
今盛時人何辜而旱既太甚肆申控扣所冀哀矜可無
普潤之功用解倒垂之望

祈雨諸廟滿散疏

政奸陰陽雖吏之責物底疵癘亦神是憂比殫請雨之

誠冀動依人之鑒敏有甚於桴鼓庶或感通望方切於
雲霓倚需貺施

觀音殿祈晴疏

豐年在望久雨為裁抱饑饉憂莫慰懷生之願有慈悲
父宓推度厄之仁是敢控祈仰資哀佑伏願掃清沴虐
揭作祥曦膏澤多豐年節淫霖而不害慧日破諸暗俾
嗣歲以應期

罷散疏

雨執連縣民情跼蹐仰福神之儼極輔鴻造以好生

音觀

殿云赴索訶世間之諸苦賴補陀大士之能仁神廟云惟神抱正直之德輔帝底施生之功

庸訴哀

誠已羞淨供宿雲解駁喜后土之告乾朝日暉華爍羣陰而盡掃迄成豐歲仰賴宏休

福溪巖祈雨疏

小郡罹暎焚之旱屢羞控祈至人以利濟為心肯厭塵黷躬造棲真之地冀施起廢之仁伏願俯光明臺宏悲願海察下吏熏心之迫慰斯民戴目之須起潭洞龍眠

霈三日為霖之澤與里閭爵躍沐一時起死之恩

志公巖祈雨疏

繆政奸和遂成常暘之沴至仁惻物屢殫歸命之誠雖
響應之不遲終屯膏之未溥爰茲謁款所冀感通伏願
推願力之洪深悼民生之困弊起睡龍之久伏布作蜚
霖掃旱魃之如焚迄臻中孰

祈雨開啓疏

多稼在田歷時不雨嗟民愁之已甚邀帝眷之未回虔

演真科冀迎景貺伏願鑒舍生倒垂之病推妙造宏貸
之仁霈三日之霖俾嘉生之翕應餘三輔之食尚中孰
之指期庶令邇遐盡免捐瘠

祈雨滿散疏

田苗槁矣雨意邈然已虔演於仙科庶默回於帝眷伏
願鑒藻芹之微薦鼓素籥之至和導迎休祥翕楚氛之
盡掃霈作膏澤茂湯旱之為憂嘉與天民同依道蔭

聖節放生疏

千齡聖運喜當震夙之期四海恩波徧及蜚潛之類推
好生之帝德繇有永之壽祺日運長明乾旋不息得一
以正施帝祉於子孫於萬斯年扇仁風於動植凡鳶蜚
而魚躍率天施而地生儷美商邦已開三面之網告符
嵩岳更聞萬歲之呼

開啓天申節寺觀疏

繞電之祥有開華旦後天之祝旁暨寰區預演仙科

寺云

佛乘冀通帝意伏願岡陵等固箕翼儷明新又新而聖德

彌隆朔復朔而帝齡滋永一星有耀煥丙度以丁躔萬
壽無疆同天長而地久

滿散疏

候屆長嬴紀珍祥於夢日歡均普率祝睿算於後天虔

演仙科

寺云
佛乘

增羨神筴伏願蘿圖益固玉厯長新聖子

神孫日嚴於備奉玉卮寶冊時講於盛儀洪祚丕延靈
椿不老撫重熙之聖治帝王無得儼倫錫有永之奇齡
天地相為長久

聖節功德疏

里社一鳴兆聖君之有作華封三祝縣詹算於無疆演
仙釋之秘科滙臣民之至懇蘿圖鞏固玉厯延洪龍樓
五日之朝朔而復朔金鑒千秋之錄新以又新晏享平
康茂隆貺施建極而欽五福丕顯重熙後天而彫三光
自然不老

又

慶叢慈極晏享康寧恩霈寰區率均呼舞申演仙科

寺云

佛乘之秘密益祈睿筭之延洪伏願周厯又新莊椿不老
膺穹祇之錫羨綿帝統以儲休宇泰內融小廣成千二
百歲壽祺滋永齊人皇萬八千年

高宗皇帝康豫滿散疏

聖神之御六氣節宣有宜天地之薦百祥敷佑惟謹已
虔羞於淨供庸欽祝於修齡伏願誕受殊休益隆多祉
豈但松筠之等茂抑將箕翼之並明塵外鈞天皇極備
九五之福壺中浩劫靈椿閱八千之秋

天申節疏

慈極上賓遽結終天之痛南薰應候載臨誕聖之期凡
屬生成益深推感惟竺乾勝文顯有妙果而冥陽淨供
具嚴秘科少資帝所之遊式藉佛乘之力恭願圓成妙
覺密證等慈偕諸如來同入性海與大天帝均福世間
演椿算於九重輦蘿圖於萬祀

又

虹流啓慶適謳歌歸禹之初爵躍均驩若富壽祝堯之

始一寫臣民之願兩羞仙釋之科玉厯長新蘿圖允固
玉卮奉兩宮之壽孝治旁享金鑑兆千秋之祥帝齡滋
永下暨可封之屋無非躋域之民

又

天開禹子載臨震夙之期民祝堯齡外薄坤輿之遠式
嚴仙佛之供必答君父之恩恭願箕翼並明岡陵等固
兩宮備養玉卮奉萬歲之觴四表來同金鑑上千秋之
錄小周齡之與九符嵩嶽之呼三

又

虹流電繞兆帝命以維新鼇抃山呼祝聖人而有請式

嚴佛供

觀云
仙律

冀演皇齡恭願周歷長新莊椿不老玉壺

奉兩宮之養金鑑來萬國之朝松茂而川之增孰知其
極天高而地蓋厚相與無窮

又

渚告瑞以流虹載逢華旦葵傾心而向日請祝聖人羞
二氏之秘科演萬年之遐算恭願蘿圖增固寶歷無疆

聖子神孫繇慶源於寶祚玉卮金鑒叢樂事於壺天桃
薦西真星明南極象教六十小劫歲歲梵筵莊椿八十
為秋日新慈訓

又

夢日開祥自帝心之眷佑望雲拜手罄海宇以歡呼虔
羞仙釋之科仰祝岡陵之奠伏願受天之祐如日之升
鳳闕承顏永享三朝之備奉雞竿肆赦佇看再舉於上
儀光浮南極之星箕衍西真之錄六十劫住世與佛日

以比明八千歲為秋等僊椿而不老

開啓几筵道場疏

諱屬慈闈痛天傾之莫救哀纏率土紛雨泣以何追虔

演仙科

寺云
佛乘

冀資神馭伏願儼威顏之如在凌灝氣以

超然夙駕玉京乘雲金景翱翔穹昊超十地之真遊敷
佑宗祔施萬年之純嘏

滿散疏

抱終身之痛莫報深仁畢三日之哀式遵遺制茲嚴梵

設寅奉真遊

道士云茲嚴仙
供寅奉神遊

伏願覺性長圓威顏如在

逍遙帝所友泰紫於九天保佑皇圖綿子孫之萬葉

進功德疏

違大安之朝賓天寢遠抱鼎湖之痛扣地無依聊憑二
氏清淨之科少答三紀生成之賜伏願凌紫清之勝境
了解脫之真乘逍遙帝鄉作天僊之依怙保佑皇業等
翼翼以綿長胥暨民區咸蒙祉福

小祥開啓觀疏

虛興慶之至養歲叙已周演道流

寺云竺乾

之祕科臣心敢

怠庶憑僊供

寺云佛力

仰奉神遊伏願悟性象先宅心塵表

入無出有參羣帝以獨尊證聖成真位九天之最上

寺云

超證一乘俯參羣帝慧嚴常住赫慧日以中天慈觀現圓數慈雲而覆物

佑慈基統固等岡

陵

五月二十一日道場疏

物外僊遊莫攀真馭人間鳳紀游屬休辰傾下臣悼慕之誠羞內典密嚴之薦伏願性天慧日湛若圓明法海

慈航普茲濟度超證先諸佛之覺翱翔儼羣帝之朝厚
祉福於兩宮睿齡有永鞏安強於四海盤石彌堅

高宗皇帝大祥開啓疏

燕高廟之靈已終祥制演金僊之教

觀云演琳函之教

寅奉神

遊心則廓然誠惟顯若伏願妙融真覺高步上清謹
歲時之朝萃十方之僊佛駢福祉之集繇百世之本支
胥暨邇遐亟蒙保佑

滿散疏

堯服有期民猶雪泣夏時已駛禮謹祥除羞祕典以告
虔適靜筵之竣事伏願遨遊仙界怡燕梵天受羣帝之
朝金闕玉京之秘邃施萬年之祉神孫聖子之綿延偕
此函生晏然蒙佑

常平司開啓疏

堯仁所被痛隔仙遊禹服攸同奄經祥制羞供鳳驂之
馭揭虔象教之文

觀云藥
笈之文

伏願超證真乘騰凌灝氣十

地賢聖謹時敘以來朝萬年基圖傳本支而滋永

功德疏

歲高廟之衣冠可勝悲慕閱夏時之寒暑奄及祥除庸
羞仙釋之科少為君父之報伏願妙融覺性超遂真遊
玉京金闕之秘嚴環羣仙而高拱聖子神孫之蕃衍縣
億載以無疆胥暨天民同躋仁域

滿散疏

高廟尊安悼神遊之寢遠堯民哀慕茲祥祭以告除已
羞秘密之文庸罄攀號之意伏願證佛之果與天為徒

九清十地之秘嚴儼四朝之仙佛兩儀百靈之保佑傳
萬世之子孫凡他時之望雲沐遺澤而躋域

滿散疏

服堯之喪奄屆祥除之制體舜之慕敢稽薦盥之誠已

歲梵筵仰資僊馭

觀云羞淨供於琳宮殫徽誠於僊馭

伏願具古佛智與

造物遊八境九清肅來朝之羣帝三乘十地環歸命之
諸天綿有永之本支施無疆之祉福

小祥罷散疏

慈闈結戀祥制告期仰資仙界之昇已演佛乘

觀云道流

之

祕伏願洞明覺性妙證真常馳馭為九天之遊頓超無上蘿圖鞏百世之永敷佑彌隆

提刑司開啓小祥疏

攀親馭之龍髯痛之甚者閱天時於駒隙祥則廓然

虔演佛乘

觀云道科

用殫臣禮恭願佑上帝之座御羣帝之

真遊尊中天之居統九天之仙衆鞏洪基於百世寔厚

福於黎元

滿散疏

悼興慶之虛養，脩攝提之告周，敢竭丹誠，已羞淨供。伏願凌玉輿於沆瀣，造物與居拱金闕之祕嚴，衆真咸衛用翊扶於寶祚，措富壽於仁民。

皇太后大祥功德疏

違長樂之朝，痛纏宸極，諏攝提之運，甫屬祥除。虔羞仙釋之秘嚴，庸罄宗藩之控，扣伏願性融妙，覺聖證自然。寥陽帝宮，肅衆生之拱扈，極樂國土，即上品以超昇，誕

敷嘉祥均被生齒

開啓疏

月律初望適三官下降之辰仙科謹儀祈千里亟蒙其
佑仰鼓桴之亟感憐耕鑿之含生嗣享豐年連覺甘四
鬴之食熏為和氣鼓腹共一臺之春於樂聖時永依道
陰

罷散疏

民已樂生盍迎嗣歲月云初望敢控丹衷茲演仙科仰

通帝意冀衆真之敷佑盡滌愆尤俾百穀之嘉生坐臻
富庶

龍母疏

神休所庇飛空專普潤之功廟貌有嚴闔境肅誕彌之
慶爰因穀旦庸歲淨筵伏願俯答民心仰尊帝命俾右
湖左海之俗嗣享豐年絕鳴條破塊之虞迄成樂土冀
誠孚於肸鬻當歲薦於旨嘉

為徐南卿乞米疏

徐南卿行身如魯男子傲世若西山夫九守窮途駢來
奇禍方越石父墮縲紲誰其乘駟以請之暨王參元赭
垣廬深愧焦頭而救者坐觀枵腹誠復何心此客不無
覬知己之逢老子未始為強人之事茲焉破戒政自犯
嚴若富家翁於寒士謂何輟凶年穀亦古人難者想去
彼取此所以輕千里而來俾虛往實歸庶其慰諸公之
意

房州辭廟疏

兩書下下之考民免怨咨一荷冥冥之私事無瘵曠茲
申控扣庸冀保綏伏願俯恤微生曲垂終惠楚氛迄息
病軀新藥物之功江浪不驚晚境畢鄉榆之樂

停推疏

體上心之止辟庀職惟勤底郡政之空囹收功有自庸
羞釋供少答君仁繫吳要衝自昔都會鼠牙雀角雜然
難明玉律金科使之易避至邦人之不犯由聖化之已
孚敢憑諸佛之仁益熏協氣俾無一人之獄旁暨普天

欽惟等慈俯鑒昭報

又

布宣化之教條載更歲鑰捐問囚之筭楚三啓梵筵由
君德之好生底郡民之遷善茲嚴淨供庸導至和敢輕
兩獄之平反虔副九重之欽恤冀絕向隅之泣例也盡
心庶陶邇畔之風使之無訟仰惟妙覺鑒我翹誠

又

御衆以寬方聖上推好生之德得情勿喜致郡民孚遠

罪之心虔羞佛供歲已再三仰報君恩意希萬一載仗
竺乾之秘教俾陶建德之純風凡曰含生微一夫綴縷
之繫庶幾盛世追中古囹圄之空

古城寺僧化十八羅漢疏

十八尊宿湛然圓通大千衆生咸所依怙欲寫國清寺
具足體請看古城僧精進心當有達人助此勝事我相
壽者相莫生一點自它佛身聲聞身要是大家香火無
量因果便須承當

光孝寺建佛殿疏

有唐名剎合盛於熙朝大雄秘宮劣存於故址劫火歟
遭罹之酷精藍墮寂寞之濱住持更幾人叔出季處之
靡定經營不一日銖積寸累之有涯未免小舉而大遺
幾成置本而狗末儻黃面老之像設弗獲所棲則舉直
師之願心得無遺恨多助良以得道成事不嫌因人仗
四衆之信心還千齡之壯觀繼今晨香暮火永燕徽祖
在天之靈凡其片瓦尺椽無非給孤布金之惠

神居山寺興三門厨堂疏

嚴法席之局要為安穩除食輪之地尤戒因循按為郵
郡之主山昔有神居之佛屋荆榛粗剪宛如劫火之初
日月其除良切鄉賢之恥茲宜急伊蒲塞之供豈特謹
鐵門限之防冀舊觀之兩新賴信人之多助繫萬人
不費之惠何妨信手拈來追平時輪奐之功會見從地湧
出更辦羞福德藏式用答喜捨心

小疏

戶屢罕前炊烟無寄寧惟興衲子之歎亦以重賢者之
羞捐杖頭錢八方俱祇園之衆領聲前意一諾敵季布
之金

建橋砌階疏

長路安行要免衝泥之病飛橋徑度更寬迂步之勞兼
二者以修營實羣情之願欲陶塼灰石亟收鼎成之功
傾橐捐金當有度外之士

廟路砌階小疏

獄神行殿郵郡左方遙千里以乞靈情不已者俾萬人
之安步利其博哉冀遂甃甃之功可無揮金之士

砌街浚渠疏

潔汙通塞弗為胡成出力捐金有唱斯和眷此嬉遊之
地久興湫底之嗟浚溝闢塗蕪居者行者之公願陶甃
龍石豈日計月計之近圖鳩六十餘丈之工會千五百
緡之費得人任責指日告成凡屐蠟之經行冀慳囊之
小破

安樂院砌階疏

人間坦塗本無不可脚底實地茲豈徒然欲免傍險衝
泥正須因人成事毋使葛繁方便專美有聞自今持地
圓通見成無礙當四集揮金之手看一新甃甃之功此
去大家安行要是一段奇事

尼求度牒疏

出家是大丈夫事允屬當仁得度以比丘尼身要須本
色人能贊喜誰不圓成看我擔囊遍干無碍大士佇君

指廩證果清淨法身一句合頭萬金唾手

建龍廟疏

分一勺之清甘澤為豐樂下九重之褒錫用赫威靈昔
假郡符實膺神貺茲大新於祠宇庸仰副於上心敬捐
毫分以助樸斲

砌街疏

街雖近於新街巷猶悲於陋巷拖泥帶水孰不苦之運
甃聚沙今其時也各自勉力那不通津念向來傍險衝

泥涉患者而後知樂繼自今行商坐賈徐步亦可以當車一諾雍容大家方便

東釋迦墳院建山門疏

釋迦古刹何必舊基長翁門僧聿新保社在我欲起門戶入手便有規模更憑信人共贊勝事八家高廩又何惜一囊錢禪窟不關要共入三麼地

請機簡堂再住隱靜疏

桑下作三宿留孰知非住佛法在一切處拈起重新世

未免過現心我自無去來想某人法門標榜祖籍棟梁
喉中作金毛聲指端現無縫塔一色打臨濟鼓笛舌下
風生十載坐杯渡道場學者蟻慕雖萬年龍象力挽而
少駐然五峯猿鶴猶覲於歸來暮鼓晨鐘前日見成調
弄拈槌放拂入手更覺精神速來和一鉢之歌要驚裂
羣魔之膽不須擬議便請承當

請崇老住開元疏

住山規模僧中當得本色續佛壽命聲前已露真機重



把布袋頭解開不妨門限鐵踏破雷音一震雲衆四馳
宗公臨濟正宗簡堂嫡子寶王殿上珠壁騰輝獅子窟
邊狐狸屏迹雖曰刳心契道盖嘗出手為人殺活二機
喧靜一轍廬山滿眼幾於古廟香爐興國開單條現長
空霽月載辭普化小憩吳門與其作萬壽西堂僧孰若
為開元東道主况燕國夫人崇福之舊固自見成為符
離居士折簡而來有何不可慰一時之龍象示四衆之
梯航作用斬新分明拈出嗣釋迦三百餘會定知絕後

光前祝人皇萬八千年看取感天動地何須退避亟為
舉揚

請修老住能仁寺疏

祝聖道場豈容虛位住山尊宿要是當人只今祖席生
風何止禪和披霧修公打臨濟鼓笛立或庵門庭面壁
少林靜中已成饒舌開單安吉闢裏正用藏身拳捧頭
盡是工夫自它相更無縫罅孤雲瞥去初驚沒面目阿
師萬牛莫回方信硬脊梁強漢殺活妙用卷舒自由雙

塔昔遊況嘗作三宿計洞庭冷坐無乃墮一色邊好來
作能仁住持恰與示叢林榜樣不須擬議徑辦行纏現
制雷機穿象教諸方之鼻趣流虹節拈吾皇萬歲之香

請義老住褒親院疏

能仁道場已請箇烈挈彊漢陽山勝處又須得本分阿
師來為故家住持共作宗門壯觀義公喫長安飯傳祖
師衣坐斷諸方葛藤打動古佛關捩獅子哮吼有聞必
驚鎖耶鋒銚何待已試惟吳門褒親之故刹廼相家崇

福之名區要須若人付以是事且輟鳳城之應供求登
魔坐以接人抹月披風好傍仙泉濯足拈槌放拂更教
龍母點頭

請昇老住廣惠疏

祖令方傳詎容厭鬧縮手世緣未了要須打硬到頭不
妨兼利死生豈可强分南北昇公廣臨濟流派秀應庵
宗支震大雷音野狐喪膽示正法眼古鏡當臺纔辭聖
壽叢林又主華嚴法席堂堂攝受色色見成惟廣惠之

精藍護中原之義冢忠魂勇魄委安陰宅之藏孝子順
孫與被漏泉之澤虛席以待冀公肯來重現舊時風流
燈燈不昧普答此間幽顯局局長新便請承當不須退
避

請充老住瑞巖疏

為一大事不妨遊戲世間愍四衆心未可棄置度外雖
曰因緣有待要是收放自由肯堂長老得臨濟正傳受
手庵密付孤峯頂上打坐閑雲莫羈十字路頭接人白

月遍照一音振響五天屬心作石佛主人禪宗欽仰領
精嚴法席祖令斬新豈容呼猿洞前便做省事人過緬
瑞巖之孤峙秀鄞水之落東雲山邃深厠上刹之數海
嶠密邇接大士之家勝境正須得人方丈即今虛席副
我渴想冀師肯臨飽聞信手之方圓願觀游刃莫負隨
身之竿木祇麼抽頭

請堅老住乾明疏

保社寢衰即日要須振起禪翁已試知渠未易荷擔覲

面似許作家袖手豈容閑地堅師長老挈提正教照映
叢林曹洞法窟前作金毛獅子吼密庵棘林裏藹優曇
鉢花香古祖席特為賢守一來新寶熏當效聖主三祝
宿緣不苟新乾明與換舊乾明衲子知歸東道主今為
西道主徑煩敷坐且省打包

請長老住乾明疏

古寺規撫荒涼已久道人行止收放自由要甘沒滋味
禪乃見硬脊梁漢某長老傳正法眼現比丘身向來出

手為人未始縮頭辟事披風抹月曾是北山燕居片瓦
尺椽幻出醴泉舊觀休憚無麵做餅尚能敲空作聲為
凝香主人肯來不妨奇特把圓悟禪師拈出方見神通

長翁請疏

大丈夫漢殺活祇用一機不思議心行藏初非兩轍要
看接人方便自有本色住持惟某公阿師密護象教而
乾明禪刹久墮劫灰道繫我以卷舒法因人而輕重長
翁老子率爾有請凝香大士欣然特拈說苦譚空定能

鞭石流血課無作不妨剗手駕鵬從來白月流天會
使黃金布地鋒藏掣電一分付於辦香節近流虹徑祝
延於睿算

青詞

天申節醮筵青詞

已下並代人

皇天開治世之符篤生元后率土祝聖人之壽咸罄丹
衷爰因載夙之辰虔致由中之請竊惟好生惡殺兩儀
之妙造寢兵措刑一人之極功洪惟太上之施仁默與

化工而合德必得其壽自然睿算之川增知慕其君猶
冀皇穹之桴應恭陳淨供寅奉高真金龍玉簡肅若前
陳風馬雲車庶其來下伏願翊扶國步保佑聖躬申命
用休固億萬年之基業降年有永閱八千歲之春秋

又

帝齡有永初何假於致祈天道無私亦自然而善應敢
殫悃幅仰瀆高明竊惟世道交泰之時神聖無為於上
寶圖晏粲鞏泰山而四維國祚延洪羨神筴於億載其

治有如此者非天其孰相之邇者有陰寒愆伏之虞亦
洞識扶持全安之念蓋穹昊眷皇家之意不替益隆然
臣子報君父之心有加無已即王正之初望延僊馭之
真游祈鑒丹衷俯臨淨供恭惟九清默佑萬福無疆龍
樓覲物外之天鶴駕駐壺中之日聖以益聖僊椿不老
以長芳新而又新玉冊屢書而未艾永依道蔭共戴君
尊

薦兄青詞

天倫之痛中有切於肺肝帝意可通敏或逾於桴鼓輒
伸控扣仰冀哀憐伏念臣賦性冥頑受生么麼始其多
難遽違膝下之慈晚則苟全獨賴友于之義禍倏延於
伯氏釁實自於臣躬鴻鴈作行莫遂白頭之願脊令分
影空纏黃壤之悲念俯仰成幽明之殊惟薦嚴有超昇
之助陳醺筵而寅奉丐僊馭之來臨恭願至仁俯推宏
貸察臣心手足之至愛矜亡者夢幻之短生許以懺除
振其沉滯蠅營濁世洗厯劫之積愆蟬蛻幽局證高真

之淨果志斯永畢他敢有所

青詞

妙道無方虛而應物含生多釁痛則呼天適元命之再
臨仰層霄而有請伏念臣賦資甚陋涉世多虞什一自
營幸資身而粗足晨昏色養冀將父以為懼而父某粵
自中年遽纏末疾不良步履歎殘息之僅存居惟呻呼
悼餘生之靡樂砭劑莫收於寸效寃愆恐自於宿因敢
罄潔蠲用伸祈控念痿者之不忘起痛極熏心然至誠

之無不通法先思過恭即上元之夕肆嚴清醮之科伏
願帝眷不違仙真俯降許其懺謝錫以寧康起廢鍼育
夢倏亡於二豎肉骨生死仇永絕於三彭全功有過於
良醫陰佑實憑於司命含飴晚景虔奉親闈負米此生
庶共子職誓依真教漸絕妄緣

閨上醮青詞

人生實難有戾考終之命天鑒不遠仰資宏貸之仁輒
罄哀誠庶幾昭格號為澤國繫此郵城衆流合以西來

濟為運瀆數板局而中峙匯作濤淵雖云通濟以利人或致顛躋而就死流屍不返徒燐火之陰沉主祭謂何望鄉粉而夜哭浮魂滯魄怨死妬生兵火而來纔五十年姓名可舉幾七十輩分為魑魅牽引朋儕積釁所加既天年之中斷餘殃旁及貽鬼責之何窮靜惟真科可拯幽趣肆恭陳於醺席用虔奉於僊真披瀝丹衷懇投洪造仰祈慈憫哀彼沉淪道廕旁滋釋多生之冤對法橋安濟脫衆苦以超昇繼今行者之經從無復向來之

橫天所斲生齒同我壽康

真武醮青詞

大聲疾呼脫姓名於鬼錄回生起死荷貺施於天神敢
罄丹衷用伸昭報伏念臣賦資不腆涉世多艱雖居侯
伯之家未憂凍餒比苦陰陽之寇良近貼危恐壽命之
不長致君親之莫報輒瀝由中之請冀憑陰陽之功念
真聖稟水位之精而妙力度人間之厄嘗殫控扣竟免
顛寔是即私居恭陳淨供伏願憫么微多難之質推救

護羣品之仁延以壽齡蠲其疾疚居育之上膏之下儻
不夭於天年無幽不察願不成誓永依於道蔭

祈雨青詞

邦家先務莫重農功草芥賤臣冀通帝眷敢伸控叩用
瀆高明粵自長嬴屆辰早暘為虐禱祀莫效比屋感然
呻呼饑饉為虞九重為之盱食仰測天心之見異得非
吏治之奸和默訟愆尤不遑夙夜茲恭陳於醺席庸欽
奉於仙真察其思過之誠賜以有秋之慶挽回和氣需

為三日之霖播在頌聲馴致九年之積上資道蔭滿慰宸衷

太一醮青詞

黔首望歲如痿者之念行貴神在天豈翹然而無意憑
仙科而申控蘄帝眷之仰通長夏已窮常暘未究翹雲
霓之望益挺流金焦土之災走仙佛之居未諒撫心籲
天之懇跼躅萬室歎愁一詞至若九重之憂勞幾於六
事之自責况惟委質尤切熏心仰十神之常居統一氣

之妙造恭羞淨供寅奉真遊伏願啓乃帝衷霈一雨均
霑之惠畢茲稼事全九清善貸之功無待毛澤盡而人
力窮要俾民心悅而天意解上寬宵旰俯逮困窮

又

道妙無方虛而應物民勞已甚窮則呼天載殫螻蟻之
誠未獲桴鼓之應伏念臣肅持使節兼綰郡符民之宅
生所臨八州雨不潤物亦既兩月比屋起凶年之歎九
重躬旰食之憂是責有歸非臣誰任四走羣望曾神聽

之莫聞三羞秘科冀帝衷之俯鑒惟天極常居之貴總
化工密運之權已薦潔蠲猶冀感格伏願少霽威怒挽
回泰和敷大德以好生計下臣之思過需為膏雨自三
日以為霖拯此疲民尚一人之有慶誓棲心於妙教肩
事上之精忠

祈雨青詞

驕陽為沴民且倒垂大德好生天不庸釋茲布由中之
懇仰祈宏貸之私伏念臣持節以來分臺而治所臨八

郡覲舉絕歎愁之聲上奉一人庶不孤付託之意屬茲
早暵甚害農功多稼在田槁乾無幾至仁當饋惕厲靡
遑自長夏以迄秋猶常暘之肆孽豐凶可卜弗違數日
之間凍餒是虞盍動九清之聽即琳宮而謁款冀颺馭
以來臨伏願少霽威嚴俯憐哀籲鑒聖主畏天之已至
察生民跼地之可矜挽回至和需作甘澤立蘇焦卷俾
迎中熟之祥坐息流移咸享安居之樂誓堅精白用答
生成

三元青詞

千里安安一被施生之賜三元上吉載遵禳報之科吳
門大邦聖世樂土農功勸課歲獲豐穰民氣協和物無
疵癘敬涓穀旦仰答洪私本仙律以羞崇必真遊之眷
顧俾鑿井飲耕田食咸樂生經凡普天下率土濱同躋
壽域物情攸屬天聽孔卑

薦嫂醮青詞

促促短生悼幽明之永隔茫茫洪造知感格之非難輒

攄不腆之辭仰扣蓋高之聽伏念臣稟生寡祐涉世多
虞粵自孩提已無怙恃念衰宗之靡託惟邱嫂之是憑
險阻艱難盡出提攜之力出入顧復幾侔生育之恩門
戶之寄不替於祖風娣姒相與咸儀於婦德淑諸三族
胡不百年生久臥於沉痾沒不登於中壽興言及此流
涕無從然念備更險夷務生經之為急居積釁咎慮鬼
責之或加是用虔奉醺科仰延真馭冀動九清之鑒俯
矜五陋之軀許以懺除恕其魯昧法橋安濟脫怖畏於

泉扃道蔭具依趣清涼之仙界茲焉伸控它敢有所

女就蓐設醮青詞

忽然為人女子莫危於就乳虛而應物天心不外於好
生竭惻款以叫聞獲感通而如響敢酬夙素用黷高明
伏念臣生理么微族緒單寒屬由天稟視女有甚於愛
男憂與喜并舉子當臨於就蓐呻呼可念副坼為虞方
跼天踏地之時瀝血誠而有請暨起死回生之後豈精
意之敢忘恭設醮科冀延真馭金龍玉簡庶幾賤婦之

動天風馬雲車亦許傾葵之向日欣然來下監此微誠
寸心聊效於涓埃默饗諒同於桴鼓志斯永畢它敢有
祈

江湖長翁集卷三十九

欽定四庫全書

江湖長翁集卷四十

宋 陳造 撰

致語

天申節致語

神筴告符介親齡於八袞電樞表慶衍聖壽於萬年藹
佳氣之鬱葱翕輿情而呼舞元功天運盛德日新躬攬
權綱奄神器而再造堵安區域如泰山而四維武庫縈
弓靈臺偃伯垂裳三紀黃屋非帝堯之心脫屣萬機赤

水訪有熊之道範圍一化糠粃百王揭日月而行寶冊
嚴號榮之奉偕乾坤之久玉卮介戩穀之新屬當夢日
之期均錫需雲之燕既醉之備五福悅如建德之游難
老而彫三光咸罄華封之祝某等云云

遐想雲璈奏未央璇輿金籙慶生商九光霞裏停仙仗
萬歲聲中奉帝觴天上擗麟供樂事人間舞鳳侈恩光
小臣願效華封祝試頌靈椿壽聖皇

對廳

電繞虹流式紀生商之旦駕羣鷺序均霑燕鎬之恩晷
佳氣於堂皇沸歡聲於絲竹恭惟某官璇源襲慶玉壘
分符亟沉榆塞之烽復最甘泉之課詩價萬選家傳賀
白之文章帝闈九重屏記龔黃之姓字人近晉卿之冬
日訟銷京兆之妬筒森畫戟而凝清香居惟多暇入黃
扉而升紫闥其始於今適偕聯事之羣英共醉釣天之
廣樂某等云云

黃堂綠影轉槐龍錦繡圍中度好風珠履相輝人峙玉

金壘更勸酒如空逢辰正自千齡會勝日何妨一醉同
來歲從公話今日鈞天應遙未央宮

王母致語

渚虹告符萬世特遇大聖神筴錫羨非天私我有邦言
辭少廣之居來獻長生之籙恭惟睿聰稽古信順尚賢
挺謨斷以有為武功底定闢乾坤而再造文德誕敷偃
伯靈臺沉烽邊瑣脫屣萬乘心偕造物而與之遊冠德
百王道長上古而不為老備聖子神孫之色養新玉卮

寶冊之號榮長嬴紀夢日之祥中外效後天之祝翠水
雖弱水之隔駟青鳳以非遙僊人為聖人而來獻碧桃
而敢後肆陳善頌用贊殊休丙度丁躔占一星而有煥
天覆地載綿萬祀以無疆於樂聖時可無口號

曾燕瑤池到世間祝堯今復馭青鸞衆真已送駢蕃瑞
萬國同瞻咫尺顏聖統有傳尊北極帝齡無盡等南山
兒家幾許蟠桃熟準擬年年薦露盤

對廳

嵩呼萬歲已欽祝於堯齡花覆千官復均歡於鎬燕歌
白雲而來下款黃堂而小留恭惟某官僊府上才皇家
碩德韞通儒之業蚤收甲乙之科歌樂職之詩誕布中
和之政農桑千里襦袴一時綵服娛親居奉平反之笑
紫泥封詔佇歸清切之班儀鸞坡鳳掖以蜚英俾鷺序
鴛羣之連茹喜鈞天之分帝樂既洽清歡雖弱水之隔
仙居來陳善頌可無口號用奉台顏

綠輿初下玉龜山小駐黃堂相府蓮上客居多天下士

主人況自地行仙九光霞裏聞譚笑三素雲中度管絃
來歲日邊桃薦碧帝觴應共醉釣天

平江府天申節致語

地闢天開啓重熙之景運虹流電繞逢載夙之休辰孰
非建德之遊共上華封之祝健符乾運中合離明把握
神機奄皇圖而再造輯寧大寶如泰山而四維道妙莫
名功成不有納虞舜於大麓蓋嘗與天為徒訪蒲衣於
姑山豈曰以位為樂傲睨物表真遊象先聖子神孫儼

天臨於備奉玉卮寶冊當歲講於祫容屬茲夢日之期
庸效後天之頌恭惟心傳精一運繼聖明行曾閔之所
難若文武之共處躬撫皇業踵慶厯嘉祐之隆志養慈
闈奄大安興慶之禮奉帝觴於漢栢介親壽於莊椿驪
洽兩宮慶流九寓某等云云

擗麟脩酒紫皇家降乙開祥寶祚賒又見仙真奉瑤檢
從教日月數金沙星明丙極方呈瑞燕敞需雲共拜嘉
睿算的知天與久大椿何必問南華

王母致語

祥開夢日喜切望雲南極星躔已見老人之瑞西方仙
窟敢安少廣之居按飈馭以小留望宸廷而獻頌聰明
作后適駿有聲載戢干戈享帝王不戰之福兼愛夷夏
儼祖宗勝殘之仁動則神謀靜惟淵默赤符啓運奠神
器於覆盂黃屋非心視天下如脫屣據位之貴為天子
父體道之妙與造物游修身乃普乃豐得一以正大德
得名得位於萬斯年豈惟嵩嶽之三呼將見蟠桃之再

熟恭惟繼堯接統法舜事親色難躬五日之朝備奉極
四海之富屬長日離明之旦慶慈闈震夙之期造金殿
以陳儀奉玉卮而介壽事光千古歡浹兩宮妾企慕華
風雖曰隔三萬里之弱水祝延睿算可不指八千歲之
大椿矯首皇居願陳口號

天仗凌晨拱未央君王親奉紫霞觴社鳴當紀乾坤闢
筴授端知日月長為祝堯齡辭翠水閑留羲馭頓扶桑
兒家不上千秋鑒自摘蟠桃壽聖皇

通衢致語

仙佛瑤香已上萬年之祝君臣慶會旋羞九獻之儀雖
分侯服之區均拜帝觴之賜奔趨萬室誦詠一詞某官
學冠時髦道窺聖閫射宸廷之策諸公推荀況之文登
使者之車一旦展范滂之志清濁激揚御以儒術愷悌
慈祥今之吏師才用具宜身獨兼於三組政聲藹著名
已徹於九重倚須下芝檢於日邊即看綴仙曹於雲際
屬生商之華旦為燕鎬之主人都騎如雲旋指凝香之

地驩聲載路孰非誦德之民敢採公言上陳口號

清微風動萬年枝瑞紀流虹誕聖時天上玉卮山比壽
侯邦錦席酒如池滿城淑氣生英蕩夾道驩聲度綠旗
來歲望公天仗側尚應回首記吳兒

趙守燕王漕致語

煙霏夕霽已瞻漢使之星色笑春溫復近晉卿之日爰
追勝踐有秩初筵答毗俗之具依翕謹謠之載路恭惟
某官夾邦哲輔名世鉅儒汲直素風肅具臣而知畏樂

天麗句播異域以爭傳中裨宰席之嘉猷屢上計臺之
最課席前賈傳佇還清切之班轡攬范滂再展按澄之
志屬城畏愛百吏傾瞻今者稽玉節於脩塗踵文游之
故事迂臨觴豆用慰吏民某官麟趾標奇熊轡效職昔
襦今袴騰萬口之驩呼賣劍買牛勤三時之勸課屬行
臺之按轡駐支郡以攷春喜同千里之民共叙二天之
庇壺天動色錦席增輝藹香霧於簾旌泛光風於譚塵
金壘玉笋不妨舉白以更酬黿禁鳳池行看汗青之儷

美某云云

二天依德幸吾州
四牡徐驅得小留
勝日非烟浮綺席
異時盛事繼文游
春還蓓蕾生譚笑
香泛叵羅賸獻酬
來歲鳳池雙立玉
應從丹地話秦郵

鹿鳴宴致語

鶚贖登名庸餞觀光之客
鹿鳴侑酒式將勸駕之誠
挽春意於壺天
圍香風於錦席
初筵有秩
樂事可涯
恭惟某官
名世鉅儒
爽邦哲輔
陳陳胄次
富人間
未見之書

表表朝端罄古者格心之業帝眷股肱之郡時須心腹
之臣布條教之尚新翕歌謳之載路刺史承流宣化俾
里閭均躋域之仁上臣事君以人必俊造首充庭之賦
惟姑蘇之名郡據浙水之上游物阜民蕃地靈人傑文
風比屋尚白樂天韋應物之餘名教百年儼范文正胡
安定之舊雖再占褒然之選方競蜚作者之聲矧海潮
尚過於維亭而魁宿未離於吳分佇異人之輩出副明
詔之旁求諸省元杞梓國材珪璋廟器萬軸飽藏於腹

筭一第視摘於領髭志嘉會之功名傾當年之意氣穿
天心而擣藻棘闌已壓於諸儒培風背以論程桂籍行
題於千佛肇賢侯之饋食侈芳宴以盍簪紅袖回環淥
樽泛豔德星初聚密聯使者之星愛日焉依旋指長安
之日萃一時之盛事佐羣雋之壯圖正此均歡豈應惜
醉某等云云

黃堂賓宴霧香浮峙玉時髦得意秋莊海長風吹怒翼
禹門驚浪化吞舟黃生眉宇看輝映淥漲瑤盃賸獻酬

來歲歸時君記取恩袍成行擁龍頭

石湖生日致語

槐籠非霧紀楚客之庚寅椿演遐年笑絳人之甲子方
夏日薰風之可愛況良辰樂事之遂并有秩初筵將陳
善頌某官才擬王佐德優帝師聖神倚注於謀謨夷夏
想聞於風采挈提道統退之得孟氏之傳秉執國鈞晉
公乃汾陽之比不待年華之老去徑收朝蹟以歸來寧
鳥獸之亂行幾漁樵之爭席久矣斷日邊之夢翛然作

地行之仙燕坐垂車人間著小有之洞時登天鏡物外
訪無何之鄉儒墨兩忘古今一呖宿疴雪靜不寬沈約
之帶圍吟興風生已破後山之詩戒適周翰降神於崧
嶽正壽星映色於台符坐上團藥有眷令之接影眼中
秀整森蘭王之在庭斟瓊液以更酬駢雲璈之競奏修
齡未艾爛醉何辭豈惟嗣魯侯難老之詩抑已受金母
長生之錄會逢薊子記金狄之摩杪更向麻姑話蓬萊
之清淺某等云云

壽筵高敞老仙家
簾影中間五色霞
碧酒舊須麟作脯
雕盤新薦棗如瓜
玉壺縹緲非塵世
金狄依稀記歲華
勝日年年歌醉帽
鬢香長點吉雲花

神仙傳吉雲花
千歲開一枝

定海縣廳事落成致語

七夕

除聽政之地夏屋崇成
盍同寮之簪佳辰小集
載新偉觀用肅初筵
知縣優趙魏老而簡朴
有餘領邾莒邦而拙勤
不補新收舊管苦百孔而
千瘡上雨旁風幾一夕而
三徙有不得已而拔貧營
建豈自意全而其事迄成

撫已猶驚向日抱壓焉之懼舉觴相屬今親賡勞者之
歌追揆策之云初信此歡之難得而況牽牛織女方河
畔之佳期綵舫珠樓紛樽前之雅戲受涼颺於南廡延
纖月於西廂合鼓吹於兩番伊涼迭奏粲綺羅之雙列
笑語生香是為四并猶重一醉嘉二三君子肯來偕酬
酢以忘勞閱五十歲華當有想風流而嗣響兒等云云
翬飛華屋酒如池賓主風流況一時千杖敲春瓊瑩滑
九霞搖晚舞衫傲輕颺泛座漂香遠纖月窺人轉影遲

牛女多情應羨客瓜華適已習珠絲

廳事落成致語

前以禱雨罷會中秋再作

供簿書之日課暇擇華居敞棟宇以翬飛遂償初願甚
欲舉落成之酒時方從愍旱之祠逮百穀之登場得一
樽之聚首知縣老猶沉於俗吏號盍拜於散人寧躬補
拙之勤不尚濟寬之猛苦官居之久弊冀廳事之一新
聽里詠塗歌之情方安朴直舉銖積寸累之計作意經
營功乃即於優游民不聞於怨讟念規模創造之日皆

寮友贊佐之謀勢可支於百齡貧猶堪於一醉屬者棧
羊醺酒計日佳招端如澁雨怪風妨人行樂未辭故事
重舉佳辰風露中秋孰與初秋之蒸鬱里閭樂歲復無
望歲之憂虞按小鬟之新翻訪歸妓之前事豈獨延笑
譚而卜夜抑將祛塵鄙以生春某等云云

向晚簾櫳上玉鉤縣人應指小瀛洲龍蘭烟外調宮羽
羅綺香中擁獻酬百祀規模新壯麗一時文武極風流
月明鼓吹煩重賦終恐清新媿少游

房州到任交代事筵致語

斗城從仕綽有賢規樽酒邀歡尚餘春事寧四井之易
得幸一笑之與同交代一代吏師諸儒宗匠蟠胸籤軸
出月脇以擣華唾手桂枝近龍頭而中雋掉臂謝十洲
之客題輿觀九室之春周舉風規望素傾於諸彥弱翁
治行名已在於九重小稽入覲之行顧重交承之好通
判詩書玩意科第起家鷗影西來山郡平分於風月龜
章親授心期密奏於堦簞爰申樽俎之娛庸締金蘭之

契雖新舊官之胥晤祇副簡書然先後覺之相資孰非
民事某云云

平時風義等肩差況此周旋別乘衙湛淶徐傾卜夜酒
歌紅同插殿春花成規燦備堪從事殊渥便蕃定拜嘉
爛醉長吟答佳致不妨賓主各詩家

到任交權州事筵致語

攝佩郡章復締後先之契備嚴燕豆淳交款曲之歡欣
樂事之不違肅初筵而有秩交代吏能義槩交信諸臺

里詠塗歌遠周千里頃蕃星之一晦兼郡紱以雙紆佐
貳著稱碑手可捨皇甫湜顯幽交感麥舟迄濟石曼卿
郡付倅真建屋之瓠惠洽民果添花之錦將隨鸚鵡歸
覲龍顏嘉與遐邇之民同申攀戀之悃權郡不辭遠官
來繼芳塵盡承參輔之規模併受中和之條教官聯必
副豈越俎代庖云然軌躅善遵亦因雲灑潤之謂言勸
冲霄之駕共蜚介壽之觴階藥翻紅筆判花而有兆瑤
杯舉白山顏玉以何辭某等云云

假印侯封付繼承教條久已洽山城政成何異徵黃霸
日接寧惟拜水衡春酒入杯紅浪漲晚花薦座靚粧明
良辰便合同沉醉且置陽關疊後聲

待衆官致語

漂天涯之風梗同仕遐陬盍公外之朋簪庸追樂事適
夏日舒長之可愛况蘇天愷悌之焉依念同寮裨贊之
多而從事賢勞之久式陳嘉旨庸諭悰懷通判朝奉少
策足於儒科晚究心於吏事芹宮花縣偶不致於曠瘼

倅駕郡符茲併加於疲朽蟲負山而良懼鳥假翼以能
高幸仁賢此地之會逢故官府一時之振整傾肝瀝膽
迨無不盡之餘情補劓息黥用使苟安於厥職爰因多
暇聊共一歡文武寮契夙夜在公靖共爾位確持至正
之論能大所居之官率自吏良而政平底此塗歌而里
詠秋田茨委脯食四以尚餘夏隴雲黃麥懷三而既實
正用及時而行樂孰云須酒以消憂艷歌濃笑之前陳
譚麈吟牋之未慙風解愠而醒醉有不勝清露未晞而

詠歸徑當浮白某等聖朝末藝樂部下陳上承歡顏敢
獻韻語

公堂錦繡映簪紳不著人間一點塵地窄尚堪紅袖舉
情孚那復白頭新蔗漿玉醴壺天晚翠蓋紅巾暑月春
況是山城無一事醉鄉賓主屬吾人

又

帝闕九關憑寸誠而昭達山城萬室歛一雨之滂流齋
壇實自於同寅歲事繼今而有望爰申燕喜庸滌憂勞

眷此房陵實聯荆部民散居於巖險田僅列於下中頻
年多稼未見有餘十日不雨旋已告病矧今仲夏正當
耕耨以廩身未極亢陽已復怨咨之盈耳式偕寮友虔
致禱禳商羊條舞於中達旱魃遽沈於九地油然作霖
然下稼事有涯瘠而鳴痿而行人情可見眷爾俗春臺
之涵泳宜自公罇酒之招攜雲野臥黃定不憂於害馬
瑤觴漲淥當先酌於睡龍度涼吹於簾旌凝行雲於扇
影相與色笑喜雨有志於民孰為主賓既醉並受其福

某等名叨樂部躬逢玳筵敢寫歡心聿陳善頌

爐熏抽蕙裏高寒列宿低光近醺壇夜屋忽驚簷溜響
曉畦旋放桔槔閑政須酬酢乘多暇況間憂虞取一歡
投轄孟公留客意應拌月路醉扶還

喜雨燕致語

一雨應祈三農胥慶謳歌洋溢時和爰底於歲豐官府
靖閒吏安實由於民樂已保無奪糴之慮庸少踐飲醇
之盟念官路之飄零同官曹於窮僻農功就緒終蓄積

之不餘稼事或愆豈怨咨之能免有底戾氣扇為常暘
醺席龍壇再三懇禱西巖南洞萬一感通賴兩儀生物
之私拜三日為霖之賜尚晚秧之可蒔况早糴之全收
人皆較新故之年穀當有倍蓰之獲靡愛牲靡不舉孰
云自古之徒然不曰早不為災當復大書而示後惟時
寮友從事縈雲動齋素之踰旬無奔馳之虛日迨茲如
願可後嘉招日轉槐陰此歡未艾月啣桂魄不醉無歸
某等謬廁樂工仰承燕豆敢陳口號上奉台顏

華筵楚楚為誰開和氣融融逐雨回飲處偕酬未央樂
早餘新紀不為災詩成肯放庭陰轉舞困何妨羯鼓催
聽取邦人歌笑地山城幾處不春臺

交割州事致語

心期所契寧惟甲子之同郡計與聞載穆墳麓之奏一
笑超形骸之表多儀肅樽俎之陳庸諗清歡可孤樂事
某官異才名世正學傳家相門綽有於典刑仕版翕推
於模楷仁風義槩粲荆玉之無瑕朝譽民庸信陽春之

有脚推他日平反之手賡遐陬宣布之歌旋聞煖席之
初亟聽登臺之告清風八詠真俯視於隱侯平步三公
即延登於黃霸通判朝奉並辭澤國來仕楚郊素懷事
賢友仁之私被借宣化承流之潤顧熊轡委重堅有過
陳雷之膠雖鶴髮相輝聯猶是岳湛之璧爰陳燕豆用
肅賓歡化國之日舒長矧茲樂土君子有酒多旨徑指
醉鄉桂香浮壁月之秋粧面炫冰壺之晝陪遨頭之賢
守猶詫獨醒後鯨背之仙人當無此樂某等仰承玳席

忝預伶官聊寫衷懷敢陳口號

一時律呂韻金絲用播中和樂職詩所喜玳筵重啓日

還當璧月再圓時

前月十六日燕

伊涼聒夜鏗千杖蘭蕙回春

艷十眉明月酒醒還得句東遊夸與大堤兒

十四日宴來日往襄

陽

宴新守致語

浙水淮山韶風期之不隔隼輿泥軾同山郡之來遊已
諧聯事之歡偶締合符之契佳哉樂事秩此初筵恭惟

判府寺正擢秀相門蜚英仕路筆端疊疊鄙時流纖艷
之文胄次陳陳儼祖武經綸之業小謝承明之直暫分
刺史之符竹馬爭迎豈容暖席金黿高步行復陞華通
判朝奉儒術起家州麾貳政興孫秦之後力追躡於典
刑廁召杜之旁更平分於風月無屬印章之授受可孤
樽俎之勸酬笑語生春脩雲頭之閣雨笙歌聒夜溢簾
額之漂香少答輿情共拌沉醉某等叨居樂籍仰奉綺
筵不揆疎蕪聊陳口號

相門賢裔聖門儒錦席葩羅慶合符天欽沉陰輸瑞靄
月銜清影照冰壺鸞膠密應鏘金奏麟脯何妨薦玉腴
聞道山城觀盛事一時歌舞溢通衢

任滿交割倅事致語

題輿支郡聿觀條教之新設醴芳辰庸締子孫之契亶
為勝踐有肅初筵某官高視時賢優繩祖武諸公鶚薦
手已種潘縣之花萬里鵬程符尚佐漢廷之竹仁聲所
暨春意交孚某官百舍效官二年撫俗塗歌里詠尚前

人不擾之風吏政民庸踵古者告新之義一樽於樂四
美云并妙舞清歌試新翻於北里嘉肴旨酒判聯步於
醉鄉某等云云

黃堂氷峙兩飛仙不遣纖塵到繡筵龍麝香中揮玉麈
蕙蘭叢裏醺金舡即今別乘符初合佇看丹墀壁再聯
來歲涼颼生殿閣帝觴同捧聽鈞天

任滿交割郡事致語

擁州麾而承乏兩綬兼紆陳燕席以告新多儀再舉茂

惟勝日庸罄清歡某官輩古碩儒鍾天間氣皇朝勲業
之裔綽有典刑聖世功名之躔佇光彝鼎小稽賢業俯
佐郡符某官臭味不殊交承連好教條攸領寧惟風月
之平分意氣所傾共看塤箎之合奏敬南風之館宇倒
北海之樽罍涼溢簾旌香生談麈舉觴交命未容舞困
以歌闌倒載言歸更待河傾而月墮某等云云

星屏已喜一樽俱嗣啓芳筵合郡符裊裊細香生玉醴
颼颼涼吹度冰壺錦紋眩旋明回雪雲影依微覓貫珠

乘醉言分當卜夜火城壁月共通衢

燕鄉守致語

枉賢侯之駕下逮幽人泛上巳之觴庸修故事允謂一時之盛不難四者之并有侈初筵增光前載某官清朝棟榦綠髮神仙聯肺腑於九重蘊胷竒於千古塞帷問俗暫頒漢殿之詔條補袞致君行厠舜廷之元凱而德若不足勢忘自尊回軒畧席戶之卑適館篤緇衣之好肯迂千騎俯共一樽追洛水之風流繼永和之觴詠參

議朝散須次儉幕燕居鄭鄉功名若將浼焉棋酒有足
樂者不累不屈仲元居夷惠之間載欣載奔陶翁竟義
黃之上況事賢之有素茲成室之云初屈二千石之嚴
威為七十翁而迂步挹光風之轉蕙俯流水以秉蘭擘
會稽之吟箋未妨卜夜歌庾凱之醉憤正用醺春某等
叨備伶倫喜承燕衍敢陳口號聊佐清歡

胡床玉塵錦囊詩賓主風流此一時玳席邀歡酬令節
羽觴湛碧轉微漪綺羅圍外香風遠絃管聲中漏刻遲

莫道蘭亭已陳迹勝遊端復嗣芳規

上梁文

懷莒堂上梁文

上過秦之論起殿官曹營懷莒之堂歸編戶籍蠶三眠
而欲繭鶴千載以還家小寬勃礫敢謂輪奐長翁老子
為儒甚晚與世無堪闕罷亞之供耕羨匏瓠之有處局
栖龍具動捋虎鬚服原夫塗抹之勞策名科甲耐窮鬼
揶揄之辱妄意事功俯仰桔槔漂零萍梗名疆利鎖悟

大塊勞我以生酒會文期蓋作吏此事便廢幸收晚節
歸託故棲苟祿無庸仕不偕於百雉受廬得所賦劣綴
於下臬草草創五十楹堇堇著四百指小酬左食右粥
之願亦息上雨傍風之嗟高臥北窓辦長日搜詩之課
徐行南陌試平生種樹之書夫何求哉不啻足矣可無
著語用諗陞梁行且落成聊茲善頌

拋梁東煥燿巍譙鼓角雄千騎肯來觀水薤府公真有
古人風

拋梁南橫前江影曉涵涵端復與翁供藻思老來吟興
尚驂驪

拋梁西湖天千頃瑩玻璃亦想龍公歡喜甚明珠昨夜
吐晴霓

拋梁北滿眼齊州舊封域有斧無柯古到今輪囷空蘊
平戎策

拋梁上依稀太乙低仙仗爐香知我正繙經不妨借與
青藜杖

拋梁下婦織兒耕有餘暇但令泛盎無關供長與比鄰
詠多稼

伏願上梁之後享不危之安駢無禍之福詩書壽脉有
跨竈之佳兒棋酒歡情無罵座之惡客容散人於盛世
全樂事於暮塗

定海縣廳事上梁文

古縣修營務先所急輿情悅向功奏不遲免覆壓之為
虞歛觀瞻之有偉知縣生涯鐵硯老境銅章撫黃童白

叟之愚視如族屬用柱後惠文之事御以聖經暨閱再
暮大乎衆意豈止賦輸之粗辦抑惟號召之樂從念墻
宇之傾摧坐貨財之窘匱積六十三年之久置莫任樸
斲之勞歷二三十政之餘率苟度歲月而去第惴惴而
引日居礫礫而有聲雖云東柱以西撐曷救上漏而下
濕豈容老朽復避嫌疑思蠱飭於弊端姑鼎新於廳事
規模素定纔煩頤指之勤材用畢臻翕見子來之助今
倡興於大役餘有俟於後賢片瓦尺椽初不形於嗟怨

震風凌雨當未沫於旃幪尚來者之興懷冀嗣茲而有
作爰差勝日肇舉脩梁敢采公言用陳善頌

拋梁東蓬瀛珠闕貝為宮仙曹集處應迴首定指塵勞
笑此翁

拋梁南山影江光映蔚藍喚渡行人逢野老應收拙政
入叢談

拋梁西水夾田疇一帶齊他日地毛龜拆處如今翠羽
望中迷

拋梁北後海風停湛平碧天驕不敢望南天萬竈烟青
旗影直

拋梁上楚氛盡掃瞻清曠日馭舒遲黃道明太平未信
真無象

拋梁下民區富樂官多暇比櫛困倉驗屢豐連薨絃誦
知皇化

伏願上梁之後民情安妥縣計豐滋絃奏武城庸務本
原之政人遊建德指須富庶之期俾他日華黍詩靡容

專美庶將來循吏傳一無愧辭是所謂吉無不利樂不可支

激犒庫上梁文

郵郡要衝城陰都會積年蠱弊謾餘酤肆之虛名千柱鼎新脩駭市區之壯觀收功有自為計無窮某官悃悃無華撫綏多暇中和布政挽昇平氣象之回夙夜究心盡經久公私之利驩謠載路朽蠹一新麗譙雄郡園之西已干雲而屹立酒市壓城闐之北復不日以崇成庸

浚利源以寬民力塗歌里詠不知畚築之勞動坐賈行
商咸歎規模之巨麗是為創見高掩前聞儻繼加增葺
之功則永為裕足之本豈徒醉鄉千里之地建德一時
之民將龜日以落成茲虹梁之肇舉可無善頌用紀公
言

拋梁東日氣葱曠碧海中聞道羣仙輕一醉得無笙鶴
下蓬宮

拋梁南萬井笙簫瑞色涵白塔丹霞霄漢上炯然金碧

吃相參

拋梁西天外重湖天與低波底睡龍應矯首為翻明月
吐晴霓

拋梁北路轉邗溝千古碧邊風不遣一塵蜚信節年年
馳使客

拋梁上鴈天雲路饒清曠把杯當有謫仙人昂首高吟
企仙仗

拋梁下請駐香車羈寶馬未妨醉臥月明中生世清歡

本無價

伏願上梁之後連甍佚樂百貨阜通飲醇而相漢家尚
冀曹裝之小駐飽德而器君子庶幾周頌之嗣聞嘉與
民編共陶德政

臨澤常住院上梁文

精藍益煥秘殿鼎新抗鳳嶺以孤騫一踵昇平之巨麗
屹鷲峯之幻出四傾有衆之瞻依境勝左方寺標常住
自天嘉儀同冥心捨宅肇基安衆之區若給孤大士隨

喜布金首壯乞靈之地頃嗟寶剝條墮劫灰纏淨界之
妖氛鞠福田之茂草邇遐萬井悲喑一辭彼上人幾年
服勞大檀越一力喜捨什百有千萬之積輪奐起汗垺
之餘侈皇宋之椿齡祝延有在遙釋迦之魔座竭蹶以
趨凡屬見聞肆同饒益迄今龜日爰上虹梁欲寫歡心
可無善頌

拋梁東喬雲泛日曉瞳矇遙知鶴背三山客奔驚來從
獻寶宮

拋梁南吳山越嶠儼相挽參差影落清溪底千丈奔虬
臥蔚藍

拋梁西未多少廣與天齊竺乾教法宏金地端為舍靈
待指迷

拋梁北昌期偃伯邊烽息少待羶棗渭上朝更須椽筆
燕然勒

拋梁上黃道非煙儼仙仗天人闕首梵筵尊天風便旋
天花漾

拋梁下麥浪搖搖覆平野佛慈帝力共難名試聽康衢
謳詠者

伏願上梁之後象教興行龜圖昌熾續佛受命正法眼
藏之普傳為國焚修太平君子之假樂十齡沐慶元之
化一武同建德之遊

江湖長翁集卷四十